

Vischnauncas
da Laax,
Sagogn e
Schluein

Messadi da votaziun davart la fusiun



Prefaziun dils presidents communal

Preziadas habitontas e prezai habitonts dallas vischnauncas da Laax, Sagogn e Schluein

Laax, Sagogn e Schluein ein vischnauncas unicass, vitalas ed attractivas per habitar. Gia dapli plirs onns collaboreschan ellas cun success sin plaun intercommunal e cultural. La finamira dil project da fusiun ei d'augmentar vinavon las sinergias e da trer a nez aunc meglier las resursas disponiblas.

Il project porscha numerusas novas schanzas per las vischnauncas participadas e bia avantatgs per las habitontas ed ils habitonts. La populaziun sa per exempel profitar dalla purschida multifara da tut las vischnauncas, da novs projects e da meglieras cundiziuns da basa per il mistregn, l'agricultura, il turissem e l'infrastructura, mo era da survetschs professiunals dall'administraziun communal. Ina fusiun da vischnauncas mitighescha era la situaziun en general difficila d'occupar ils posts els gremis communal che ston ultra da quei ademplir pretensiuns adina pli aultas. Il medem mument rinforza ina fusiun la posiziun dallas vischnauncas che san aschia far valer meglier ils interess communal enviars il cantun e las corporaziuns regiunalas.

Nus engraziein a tuttas e tuts che han gidau ad elavurar il project ed anflar las meglieras sliagiunss pusseivlas. Nus essan perschuada ch'ina fusiun creescha ina ferma vischnaunca per il futur.



Franz Gschwend


president communal
da Laax

Thomas Candrian

president communal
da Sagogn

dr. Ralf Schlaepfer

president communal
da Schluein



Cuntegn

Situaziun da partenza	4
Finamiras dalla fusiun	6
Survesta e resumaziun	7
Facit	12
Cunvegna da fusiun	13
Ils proxims pass	16
Proposta	16

Situaziun da partenza

En general

Il 2020 han las suprastonzas da Falera, Laax, Sagogn e Schluein decidiu d'examinar il tema d'ina fusiun da vischnauncas sin fundament dalla vischinonza geografica e dalla buna collaboraziun existentia. A basa d'in preproject dueva la populaziun haver la pusseviltad da s'exprimer davart l'idea. Ella gruppa da project e las gruppas da lavur accumpignontas han varga 30 persunas (denter auter era digl Uffeci da vischnauncas dil cantun Grischun) elavurau ideas, finamiras e cundiziuns da basa per ina fusiun. Quellas ein silsuenter vegnidas presentadas allas radunonzas communalas dallas singulas vischnauncas. Laax, Sagogn e Schluein ein s'exprimi claramain en favur dall'idea da fusiun, Falera perencunter ha refusau ella. Las suprastonzas communalas da Laax, Sagogn e Schluein han sin quei decidiu d'iniziar comunablamein in project da fusiun.

Il messadi da votaziun present duei orientar la populaziun davart la fusiun dallas treis vischnauncas e contribuir alla formaziun dall'opiniun.

Collaboraziun existentia

Las treis vischnauncas da Laax, Sagogn e Schluein collaboreschan gia oz stretgamein en differents secturs, p.ex. scola, pumpiers, selvicultura, alianza da taglia e spitex. Biaras incumbensas ein era regladas sur la corporaziun da vischnauncas Surselva.

Las fuormas da collaboraziun existentas cun instituziuns ordeifer il perimeter da fusiun vegnan a cuntinuar independentamein dil resultat da votaziun. Il medem vala era per projects currents e temas gia reglai sin plaun intercommunal.



Ina survesta dallas vischnauncas

Laax

La vischnaunca da Laax (rom. era Lags) ei situada sin ina pintga terrassa alla spunda settentriunala dalla Val dil Rein Anteriu. Igl in-tschess communal s'extenda dalla Platta Pussenta e la Val da Mulin imposanta tochen al spartauas dallas muntognas grischunas e glarunesas. Grazia al svilup turistic s'auda la vischnaunca oz tier ina dallas destinaziuns da vacanzas e da sport d'unviern las pli modernas e grondas dallas Alps.

Schluein

La vischnaunca da Schluein ei situada sin las flancas seniastras dalla Foppa e dispona d'in clima favoreivel. In grond avantatg ei era la situaziun da traffic centrala denter Glion e la regiun da Flem/Laax. La piazza da golf Sagogn-Schluein accentuescha l'impurtonza adina pli gronda dil turissem. Ina petga essenziala per l'entira regiun ei ultra da quei la zona d'industria Isla cun varga 30 menaschis.

Sagogn

La vischnaunca da Sagogn ei situada sin ina planira sur il Rein agl ur dalla Ruinaulta. Ella dispona d'in clima fetg migeivel e d'ina gronda biodiversitad. La vischnaunca da Sagogn secumpona dallas duas parts Vitg Dado e Vitg Dadens ed ei grazia a sia posiziun fetg attractiva per famiglias cun affons. Ils davos onns ha la vischnaunca investau en divers projects, p.ex. ella casa da scola ed el provediment d'aua.

vischnaunca	Laax	Sagogn	Schluein	total
surfatscha en ha	3168	685	481	4334
posiziun	1016 m.s.m.	780 m.s.m.	762 m.s.m.	-
punct il pli bass	805 m.s.m.	630 m.s.m.	671 m.s.m.	-
punct il pli ault	3025 m.s.m.	1208 m.s.m.	1374 m.s.m.	-
habitontas e habitonts	1990	751	614	3355
affons da scola	99	50	39	188
affons da scoletta	36	20	15	71

cefras actualas dallas vischnauncas (stan 2021)

Finamiras dalla fusiun

Finamiras concretas

Igl intent dalla fusiun da vischnauncas ei da:

– augmentar l'attractivitat per la populaziun indigena, ils hosps da vacanzas e las uniuns

Sper ils avantatgs finanziaus menziunai sin las proximas paginas profiteschan las habitontas ed ils habitonts egl avegnir denter auter dalla tariffa d'indigens per numerusas offertas dallas vischnauncas, per exempel: bus local, cuorsa liunga, sport da skis ni era sport da stad. Ils hosps da vacanzas profiteschan denter auter da cartas da hosps pli attractivas. Buc il davos profiteschan era las uniuns d'in ferm sustegn dalla Fundaziun Pro Laax.

– megliar las cundiziuns da basa

En cass d'ina fusiun san las treis vischnauncas profitar ina da l'autra ton els secturs mistregn, agricultura e turissem sco era en damondas dalla planisaziun dil terren e dallas colligiaziuns dil traffic. Ellas san determinar comunabla-mein novas cundiziuns da basa ch'ei aunc pli attractivas per las habitontas ed ils habitonts e che preparan la vischnaunca fusiunada per in avegnir em-permettent. Ils projects d'infrastructura san vegnir realisai ensemen el liug ch'ei adattaus il meglier.

– realisar projects pli attractivs

La fusiun permetta da realisar projects pli attractivs. La differenza d'altezia per exempel lubescha ina megliera gestiun dall'aua e porscha ulteriuras pusseivladads da producir electricitad cun ovras hidraulicas per aua da beiber. Grazia al diember da habitontas e habitonts pli grond sunter la fusiun san ins realisar projects da habitar per pliras generaziuns e la posiziun favoreivla pussibilite-scha d'optimar las colligiaziuns cun bus e tren.

– render pli attractivas las plazzas da lavur ell'administraziun communal

En ina vischnaunca miez gronda san ins optimar igl engaschament dallas collaboraturas e dils collaboraturs e reglar meglier las substituziuns. Igl ei era pusseivel da sespecialisar en certs secturs. La vischnaunca fusiunada sa daven-tar pli attractiva sco patruna e far frunt alla munconza da personal qualificau ch'ins senta era ell'administraziun. Aschia profitescha la populaziun d'ina pur-schida da survetschs administrativs efficienta e professionala.

– professionalisar ils survetschs e nezegiar meglier las resursas

La fusiun permetta da crear sinergias sco era da concentrar e trer a nez meglier las resursas (finanziaus, organisatorias, materialas e naturalas). Cheutras ei la vischnaunca fusiunada ella situaziun da passar si viers il cantun e las corpora-

ziuns regionalas cun dapli peisa e surtut porscher alla populaziun survetschs innovativs d'aulta qualitat.

– reunir ils gremis politics

Ils gremis politics dallas treis vischnauncas vegnan reuni. Aschia vegn ei el futur ad esser pli sempel d'occupar posts vacants els gremis politics cun novas per-sonalitats motivadas. Quei gida a reducir la munconza generala da candidatas e candidats per ils uffecis communalas.

Survesta e resumaziun

Documents detagliai

Il rapport final detagliau, ulteriurs documents e la curvegna da fusiun ein dispo-nibels sin las paginas-web dallas vischnauncas da Laax (www.laax-gr.ch), Sagogn (www.sagogn.ch) e Schluein (www.schluein.ch).

Reglamentaziuns transitorias

Ils presidents ed ils vicepresidents dallas vischnauncas da Laax, Sagogn e Schlu-ein fuorman ina **suprastonza transitoria** che prepara la fusiun e resta en uffeci tochen il mument dalla fusiun. Quella elavura la constituziun e la lescha da taglia. Las votantas ed ils votants dalla nova vischnaunca voteschan a caschun d'ina **radunonza communal constitutiva** davart la nova constituziun e la lescha da taglia. Ultra da quei vegn la legislaziun unificada aschi spert sco pusseivel. Ils organs previ ella constituziun vegnan eligi tenor la nova constituziun, e quei avon che la fusiun va en vigur.

Organisaziun politica

Il **num dalla vischnaunca** fusiunada vegn ad esser «Laax» - sin fundament dalla reputaziun colligiada cul num e dils avantatgs corrispundents. Ils nums Sagogn e Schluein restan sco denominaziuns geograficas, per adressas postalas e per tablas dil liug.

Per sviluppar in niev **uoppen communal** han las vischnauncas realisau ina concorrenza ed eligi la proposta da Sue Kisling (grafica e concepziun visuala).

Sebasond sin la lescha da lungatgs cantunala vertenta vala il romontsch sco **lungatg da scola e lungatg official** dalla visch-naunca da Laax fusiunada. Per rinforzar vinavon l'identitad ro-



montscha duei il romontsch vegnir mantenius e promovius activamein ella nova vischnaunca.

Il contract da fusiun tegn quen explicitamein da quella circumstanza. Ultra da quei sustegn il cantun Grischun quellas stentas cun ina contribuziun da CHF 500 000.–.

Organs communals

Igl organ suprem dalla nova vischnaunca duei esser la **cuminonza dallas votantas e dils votants all'urna**. Ella decida davart il decret e la midada dalla constituziun communal, davart in'eventuala ulteriura fusiun futura, las elecziuns dil presidi communal, dils ulteriurs commembers da suprastonza e dalla cumissiun da gestiun. Credits d'impegn cun in volumen da varga 5 milliuns francs vegnan medemamein suttamess alla votaziun all'urna.

La **radunonza communal** survegn cumpetenzas cumplessivas. Ella decida definitivamein davart credits d'impegn tochen ad ina summa da 5 milliuns francs e deliberescha leschas. Ella decida davart ils preventivs, fixescha il pei da taglia ed approbescha il quen annual. Alla radunonza communal vegn orientau sco tochen dacheu davart tut las fatschentas che vegnan pli tard suttamessas alla votaziun all'urna.

La **suprastonza communal** ei l'autorità directiva dalla vischnaunca e secumpona d'in presidi e da quater ulteriurs commembers. Per las empremas duas periodas d'uffeci survegnan las treis vischnauncas da tochen uss il dretg dad esser representadas en suprastonza.

La **cumissiun da gestiun** consista da treis commembers.

Administraziun generala

La **direcziun communal** garantescha la colligiaziun denter il nivel operativ (administraziun communal) ed il nivel strategic (suprastonza communal). Ella consista dil president communal e dils menaders dallas partiziuns administraziun, construcziun e finanzas.

L'**administraziun communal** vegn ad esser situada el futur a Laax. A Sagogn eis ei previu da crear in biro da turissem inclus in post da consultaziun dall'administraziun communal cun ina purschida da survetschs da basa. L'**alleanza da taglia** vegn ad esser installada ellas localitads dall'administraziun communal hodierna da Schluein. Ella ei il medem mument era in post da consultaziun dall'administraziun communal cun ina purschida da survetschs da basa.

Ils camps d'incumbensa digl **uffeci da baghegiar**, dalla **gruppa d'uaul e da luvrers communals** e dil **provediment d'aua** vegnan reuni sut ina suletta direcziun. L'infrastructura decentrala dils menaschis forestals e dalla gruppa da luvrers communals resta sco tochen dacheu. Ils dretgs acquistai dallas collaboraturas e dils collaboraturs ein garanti en cass d'ina fusiun. Eventualas restructuraziuns vegnan realisadas en connex cun fluctuaziuns naturalas e pensiunaments.

Cultura

Ina **promozion dalla cultura** activa exista gia en tut las treis vischnauncas e duei era el futur far part dalla politica communal.

Egl avegnir duei la Fundaziun Pro Laax surprender per la vischnaunca fusiunada l'incumbensa da promover la cultura. Per ch'ella sappi esser activa naven digl 1. da schaner 2024 sin igl entir intschess communal, vegn la fundaziun dotada cun in capital inicial da CHF 500 000.–. Quels mieds derivan per ina mesadad digl agen capital reuniu dallas singulas vischnauncas e per l'autra mesadad dalla contribuziun da fusiun condescrida dil cantun Grischun. Per garantir il menaschi duei la fundaziun vegnir alimentada cun 0,5% dalla taglia sin la midada da maun.

Las **facultads** dalla Fundaziun Pro Laax e dalla Fundaziun burgheisa Schluein hodiernas il mument dalla fusiun (31 da december 2023) restan ligiadas era suenter la fusiun e ston vegnir impundidas per igl intent oriund e per la vischnaunca corrispudenta. Quellas facultads ston pia vegnir duvradas en favur da Laax (Pro Laax) e da Schluein (Fundaziun burgheisa Schluein).

Vischnauncas burgheisas

Las vischnauncas burgheisas hodiernas a Laax e Sagogn san decider autonomamein davart lur futur. Ellas han **duas pusseivladads**:

- sliagir las vischnauncas burgheisas e transferir las facultads alla vischnaunca politica
- crear ina suletta vischnaunca burgheisa (fusiunada) per igl entir intschess communal fusiunau

Sche las vischnauncas burgheisas prendan negina decisiun activa tochen ils 31 da december 2023, dat ei naven digl 1. da schaner 2024 automaticamein ina nova vischnaunca burgheisa per igl intschess fusiunau. Per quella survegnan tut las burgheisas e tut ils burgheis dalla vischnaunca fusiunada il dretg da votar e d'eleger.

Agricoltura ed economia d'alp

Ella vischnaunca fusiunada han ils menaschis agricols locals il **privilegi d'utilisar** las surfatschas agricolas dalla vischnaunca da tochen dacheu. Eventualas surfatschas da cultivaziun libras vegnan purschidas als ulteriurs menaschis dalla vischnaunca fusiunada.

La cultivaziun dallas alps vegn garantida vinavon d'ina **corporaziun**. Optimaziuns dil menaschi ni adattaziuns organisatorias per cultivar las alps ein pusseivlas, sche quellas ein raschuneivlas per l'agricultura en general. Da quellas ponderaziuns fa era la cultivaziun futura dall'Alp Mughels part.

Turissem

Il interess dallas vischnauncas hodiernas defenda ina **cumissiu** che consista mintgamai d'ina representanta ni d'in representant da quellas. Las purschidas existentas e l'infrastructura turistica (loipas da cuorsa liunga, sendas d'unviern, plazs da giug etc.) restan sco tochen dacheu e vegnan amplificadas. Quei garantescha ch'ils daners dil turissem vegnan impundi era per purschidas al liug. Las tariffas dallas **taxas da hosps e da turissem da Flem Laax Falera** valan era per igl intschess communal futur. Ultra da quei vegn la purschida dil bus local extendida sin igl entir territori fusiunau, la reducziun dallas cartas da hosps vala per l'entira destinaziun e las tariffas per indigenas ed indigens vegnan unificadas. Aschia san tut las indigenas e tut ils indigens profitar dallas purschidas dil temps liber per prezis reduci.

Planisaziun locala e planisaziun dil territori

Il **models directivs dil territori communal** sviluppai dallas singulas vischnauncas vegnan applicai era suenter la fusiun per silmeins 15 onns; il terren da baghegiar enzonas resta. Surtut las finamiras gia formuladas per la zona d'industria a Schluein, il posiziunament da Sagogn e Schluein sco loghens da domicil attractivs (denter auter cun mobilisar las reservas da zonas da baghegiar) e l'enonzaziun da terren da baghegiar a Laax duein restar ligiontas per las autoritads. El contract da fusiun vegn ultra da quei determinau che la **zona d'industria Isla** a Schluein astga buca vegnir extendida sur il rom predefiniu gia oz.

Ambient, traffic, vias da colligaziun

Per il **provediment d'aua** e la **dismessa d'aua piarsa** vegn la vischnaunca fusiunada ad applicar ad interim las tariffas dalla vischnaunca da Laax ch'ei las pli bassas. La **dismessa da rumien** surpren era el futur la Regiun Surselva. Era las **staziuns da dismessa e las deponias da rumien verd** actualas restan sco tochen dacheu. Il cuosts ston vegnir cuvretgs tenor il principi dil caschunader cun taxas corrispondentas.

Suenter la construcziun dalla via cantunala nova a Sagogn eis ei previu, sebasond sil contract denter Sagogn e Schluein dil december 2010, da

- direger il traffic sin la via cantunala nova,
- ralentar il traffic da transit sin la via denter ils vitgs da Sagogn e Schluein (p.ex. cun zonas da tempo 30, vial da velos, stretganir la via).

Era il project da sviament H19 Schluein vegn persequitau vinavon.


Igl ei era previu d'examinar ina colligaziun cun la staziun dalla Viafier retica Valendau-Sagogn ed uraris dils bus locals e dils bus da posta pli adattai per garantir colligaziuns optimalas cun la viafier a Glion e Castrisch.

Finanzas

Il plan da finanzas per la vischnaunca fusiunada ei vegnius elavuraus tenor il principi da precauziun. Sco basa per ils onns 2023 tochen 2028 han ins priu surtut il preventiv 2022 e las planisaziuns d'investiziun dallas singulas vischnauncas. La situaziun finanziaria dallas treis vischnauncas la fin 2021 ei buna tochen fetg buna. Ultra da quei disponan las treis vischnauncas dad aultas reservas zuppadas dils onns precedents. Il project d'investiziun communicai dallas vischnauncas ein surveseivels e san vegnir finanziaj cun ils mieds realisai sez e cun ina politica da finanzas vinavon prudenta era en vesta ad in **pei da taglia communal** da 40%. Ultra da quei vegn la **taglia sin immobilias** a Sagogn e Schluein sbassada da 1,5‰ sin 1,0‰ e las taxas d'aua e d'aua piarsa vegnan adattadas a quellas da Laax. La **taglia sin la midada da maun** ei oz en tut las treis vischnauncas sin il medem nivel e vegn ad importar vinavon 2,0%.

Igl agen capital vegn a s'augmentar ils proxims onns e las investiziuns planisadas ella facultad administrativa san vegnir cuvretgas cun l'atgna finanziaziun.

Il cantun condescha contribuziuns unicas da CHF 6,1 miu. alla nova vischnaunca (CHF 500 000.– per il manteniment e la promoziun dil romontsch, CHF 2 000 000.– pauschala da promoziun e CHF 3 600 000.– contribuziun d'ulivaziun).



illustraziun: vischnauncas fusiunadas

Facit

Las suprastonzas communalas han elavurau ina proposta per fusiunar las vischnauncas da Laax, Sagogn e Schluein che porscha numerusas schanzas e bia effects positivs. Ella possibilitescha da trer a nez meglier las sinergias e da concentrar las resursas sin tut ils nivels communalas. Ultra da quei permetta ella da tractar el futur temas impurtonts sco la gestiun dall'aua per igl entir niv intschess communal ed aschia a moda cumplexsiva naven dil Vorab tochen al Rein. Projects sco «habitar ella vegliadetgna» san vegnir realisai comunablamein el liug il pli adattau.

Schebein ch'il num dalla vischnaunca semida cun la fusiun, restan l'identitad dallas habitontas e dils habitonts ed ils singuls loghens sco tochen dacheu – e vegnan promovì era vinavon. El center da tut las accziuns stattan oz ed era egl avegnir adina ils interess dalla populaziun. Ella decida vinavon tgei che duei vegnir realisau en sia vischnaunca.

Ina vischnaunca pli gronda drova e sa porscher survetschs administrativs innovativs d'aulta qualitat e plazzas da lavur attractivas e specialisadas. La vischnaunca fusiunada daventa aschia pli attractiva per la populaziun e per las collaboraturas ed ils collaboraturs.

Cun la fusiun survegn la vischnaunca era dapli peisa per sefar valer en contact cun il cantun, las corporaziuns regionalas ed autras gruppas d'interess. Ultra da quei condescha il cantun contribuziuns unicis ell'altezia da CHF 6,1 miu. alla nova vischnaunca.

Cunvegna da fusiun

I. General

1. Las vischnauncas da Laax, Sagogn e Schluein s'uneschon el senn dad art. 61 alineia 1 dalla lescha da vischnauncas dil cantun Grischun.
2. La nova vischnaunca senumna Laax e survegn in niv uoppen (annexa).
3. La vischnaunca da Laax fa part dil circuit electoral politic da Glion e dalla Regiun Surselva.
4. Culla resalva ch'il Cussegl grond approbeschi ella, entra la fusiun en vigur igl 1. da schaner 2024.
5. Il messadi dalla votaziun sco era il rapport final dallas examinaziuns da fusiun ein ligiontas per las autoritads e valan sco basa strategica dalla futura politica communal.

II. Effect giuridic dalla fusiun

1. La nova vischnaunca surpren las relaziuns giuridicas dallas vischnauncas oriundas, ella surpren lur facultad e lur obligaziuns inclusiv ils credits approbai.
2. La suprastonza communal secumpona d'in presidi e da quater commembers. Las empremas duas periodas d'uffeci han las vischnauncas oriundas il dretg dad esser representadas ella suprastonza.
3. Ina perioda d'uffeci dallas autoritads cuoza treis onns. Ei vegn fixau ina limitaziun dil temps d'uffeci da 12 onns.
4. La nova vischnaunca surpren tuttas plazzas da lavur. Ella ha l'incumbensa da trer a nez eventualas sinergias e da far las adattaziuns organisatorias.
5. Igl emprer pei da taglia communal vegn fixaus sin 40% dalla taglia cantunala sempli.
6. Il romontsch vegn fixaus sco lungatg uffical e da scola. Mesiras adattadas da mantener e rinforzar il lungatg oriund ein da fixar ella constituziun ed en ina lescha communal da lungatgs.
7. Il mument che la fusiun dallas treis vischnauncas entra en vigur retscheiva la Fundaziun Pro Laax ina contribuziun da 500'000 francs. Quella summa deriva digl agen capital consolidau. Cull'entrada en vigur dalla fusiun s'extendan intent e finanziaziun dalla fundaziun silla vischnaunca nova.

8. Ils models directivs davart il territori communal (MDTC) che las singulas vischnauncas han sviluppu ein d'applicar suenter la fusiun a moda ligonta per las autoritads. Oravontut il svilup dalla planisaziun dil territori sto vegnir realisau enteifer la vischnaunca nova tenor ils principis e las finamiras dil MDTC. Per talas vischnauncas oriundas che han aunc buc implementau sin plaun communal il dretg surordinau federal e cantunal pretendiu davart la planisaziun dil territori (LPTI), vegnan las lavurs dalla planisaziun locala e dall'utilisaziun fatgas aschia sco sche la fusiun fuss aunc buca succedida.
9. La zona actuala da mistregn e commerci Isla a Schluein astga buca vegnir slargiada, igl uorden actual d'utilisaziun per quei territori ei da surprender ella nova vischnaunca.
10. Ella nova vischnaunca vala pils menaschis purils dallas vischnauncas oriundas in privilegi d'utilisar las surfatschas agricolas communalas.

III. Reglamentaziuns transitorias

1. Ils mandats dallas autoritads che fineschan el decuors dil 2023 lur uffecis vegnan prolunghi tochen ils 31 da december 2023, aschia ch'ei dat quei onn neginas elecziuns parzialas.
2. Per las lavurs preparatorias tochen il termin dalla fusiun fuorman mintgamai dus commembers dallas vischnauncas oriundas ina suprastanza transitoria. Las suprastanzas corrispudentas elegian quellas persunas a moda formala. Per regla duei il presidi ed il vicepresidi far part dil gremi. La suprastanza transitoria seconstituescha sezza.
3. La suprastanza transitoria elavura la constituziun e la lescha da taglia. Avon che la fusiun entri en vigur voteschan votantas e votants dalla nova vischnaunca, a caschun d'ina radunonza communal constitutiva, davart la nova constituziun e la lescha da taglia.
4. Las empremas elecziuns succedan tenor la nova constituziun, e quei aunc avon che la fusiun entra en vigur.
5. La nova vischnaunca unifichescha aschi spert sco pusseivel sia legislaziun. Igl ei la finamira d'elavurar e d'approbar ina legislaziun unificada aunc avon che la fusiun entra en vigur. Entochen lu applichescha la suprastanza pil territori dallas vischnauncas oriundas la legislaziun a moda transitoria tenor il dretg vertent.
6. Entochen che la fusiun entra en vigur astgan las vischnauncas oriundas buca decider novas obligaziuns resp. buca approbar expensas ch'ei buca urgentamein necessarias ni che eran buca enconuschentas il mument dalla votaziun davart il contract da fusiun, resp. buca inclusas ella planisaziun da finanzas.

En cass da dubis decida la suprastanza transitoria da dar liber l'obligaziun per mauns dils organs communal responsabels.

IV. Procedura

1. La votaziun dil contract da fusiun ha liug a Sagogn ed a Schluein a caschun dallas radunonzas communalas ed a Laax all'urna. Tuttas treis votaziuns ein il medem mument.
2. Il contract da fusiun ston tuttas treis vischnauncas approbar.

V. Disposiziuns finalas

Questa curvegna da fusiun sto vegnir approbada dalla Regenza dil cantun Grischun.

Approbau dallas radunonzas communalas da Sagogn e Schluein e dalla cuminonza all'urna da Laax ils 27 da schaner 2023.

vischnaunca da Laax	vischnaunca da Sagogn	vischnaunca da Schluein
Franz Gschwend president communal	Thomas Candrian president communal	dr. Ralf Schlaepfer president communal
Rest Giacun Coray menader finanzas	Claudio Cavelti scarvon	Marco Tschuor scarvon

Ils proxims pass

27 da schaner 2023

votaziun all'urna a Laax

27 da schaner 2023

radunonza communal a Sagogn

27 da schaner 2023

radunonza communal a Schluein

Las votantas ed ils votants san decider ils 27 da schaner 2023 davart la fusiun dallas vischnauncas da Laax, Sagogn e Schluein. Sche las vischnauncas participadas ein d'accord cun la fusiun, vegn il contract da fusiun suttamess alla Regenza dil cantun Grischun per l'approbaziun. Il medem mument entra la suprastanza transitoria dalla vischnaunca fusiunada en uffeci. Ella elavura immediat la nova constituziun communal e la lescha da taglia. Silsunter vegnan ils organs previ ella constituziun eligi. Ils gremis communal actuals meinan vinavon las fatschentas tochen la fin 2023. La finala sto il Cussegl grond approbar la fusiun per ch'ella sappi entrar en vigur igl 1. da schaner 2024.

Proposta da Laax/ Sagogn/Schluein

Proposta da fusiunar las vischnauncas

Preziadas votantas e preziaì votants

Sebasond sin las explicaziuns precedentas fan las suprastanzas communalas unanimamein la suandonta proposta:

approbei la cunvegna da fusiun aschuntada.

Las suprastanzas communalas da

Laax, Sagogn e Schluein

2 da november 2022

La radunonza communal dils 7 da december 2022 a Laax cusseglia allas votantas ed als votants da medemamein acceptar la cunvegna da fusiun.